

AIORA JAUREGI PAGALDAY

A Maila | Olerkia | 1. saria

Kaixo! Aiora Jauregi naiz, Txindoki institutuan Batxilergoko lehen maila egiten ari den neska ataundarra. Zaletasun ugari ditut eta horien artean, tarteka, idaztea gustatzen zait. Ea gustukoa duzuen nire olerkia!

TOLESAK

Enberrari hazten zaizkio

geruzak urtero

izan zena babes dezan

izango denari aurre egin diezaion.

Zure azaleko tolesen artean

duzu gorde iraganaren arrastoa

egur arrailduaren antzera

zure izurrek didate erakutsi

denboraren joanik badela

eta eskuetatik d o a k i g u l a

malkarren malkoetan amiltzen den arte.

-Gaur gara haur

bihar hauts-

Baina zuk

zer duzu gorde esku ahurren artean

urak ihesi ez badizu egiten.

Besaulkian kulunkatzen zara

eskuartearen hari eta zotzez

zauriak josiz.

Oro pausatzen da zure eskuetan

(h)ura

hari.

Egunero-egunero

tantaz tanta ureztatzen dituzu liliak

tentuz

ustelduko diren beldurrez

hilkorrek baitira zinez.

Baina ohartu naiz

basamortuan oasi bat

ez izanagatik ere,

hazten direla liliak

zurrun bezain irmo

loratuz

harea pikorren artean

hazten dira liliak

zurrun

eta

irmo.

Inork inoiz inola aurki ditzan

eta esan diezaien,

tolesak tolestuz,

zirrikituetatik

jaiotzen direla benetako liliak.